

**Sekatan ke atas Rusia akan beri impak buruk kepada ekonomi global -
Manulife IM
Astro Awani
02 Mac 2022
Bernama**

KUALA LUMPUR: Potensi sekatan punitif ke atas Rusia yang menjejaskan bekalan barang seperti gas asli, logam kritikal dan produk pertanian akan memberi impak buruk kepada ekonomi global, kata Manulife Investment Management (Manulife IM).

Ketua Strategi Makronya di Asia, Sue Trinh berkata, keperluan terhadap komoditi tertentu, dari segi sejarahnya telah mencatatkan lonjakan ketika konflik dan boleh memberi masalah kepada rangkaian bekalan global dan mencetuskan tekanan harga meningkat dalam persekitaran inflasi yang sudah pun membimbangkan.

Rusia adalah pengeksport terkemuka dunia bagi gas asli yang merangkumi 17.1 peratus daripada pengeluaran global dan pengeksport kedua terbesar bagi minyak mentah.

Negara itu juga merupakan antara pengeluar logam kritikal terbesar dunia dan pengeksport terbesar paladium dan berada pada kedudukan kedua selepas Chile dari segi tembaga bertapis.

Rusia dan Ukraine turut menjadi pengeluar pertanian yang signifikan dan gabungan eksport gandum, barli dan jagung dari kedua-dua negara itu menyumbang 21 peratus daripada jumlah global. Mereka membekalkan 60 peratus daripada minyak bunga matahari dunia.

"Dalam senario ini, ia akan bertindak sebagai kejutan stagflasi tambahan -- iaitu pertumbuhan lebih rendah, namun inflasi lebih tinggi -- dan ini akan menjejaskan terutamanya pengimport bersih komoditi ini," menurut Trinh dalam nota penyelidikan.

Beliau berkata Asia Pasifik adalah pengimport bersih makanan dan tenaga terbesar dunia.

Bagaimanapun, beliau menegaskan rantau ini tidak monolitik dan mencatatkan lonjakan mendadak dari segi makanan, selain harga tenaga, akan memberikan impak yang tidak sekata.

"Bagi pengimport bersih, perkembangan seumpama ini adalah negatif dari segi kejutan perdagangan dan akibat selanjutnya dalam pertumbuhan ekonomi, dan dijejaskan lagi dengan permintaan domestik yang lemah," katanya.

Trinh berkata sebaliknya ia akan bersesuaian dengan pengeksport bersih makanan dan tenaga.

Katanya pengeksport bersih terbesar bagi makanan dan tenaga (dan, sehubungan itu, negara paling kurang terjejas) adalah New Zealand, Malaysia, Vietnam dan Australia," katanya.

-- BERNAMA

© 2021 Astro AWANI Network Sdn. Bhd. (535275-D) All Rights Reserved.

Source: <https://www.astroawani.com/berita-bisnes/sekatan-ke-atas-rusia-akan-beri-impak-buruk-kepada-ekonomi-global-manulife-im-349590>